



## Protocol

dalla seduta dil cussegl da vischnaunca,  
gievgia, ils 15 da november 2018: allas 20.15 – 22.30  
Liug: Center sursilvan d'agricultura a Salaplauna

---

**Presidi:** Armin Manetsch

**Actuar:** Paul Duff

**Presents:**

- |                              |  |   |
|------------------------------|--|---|
| a) Cussegl                   | Christoph Berger<br>Stefan Columberg<br>Edgar Durschei<br>Anna Maria Genelin<br>Admir Jasarevic<br>Christian Loretz<br>Helga Probst-Linder | Armin Berther<br>Adrian Deflorin<br>Mario Flepp<br>Rita Huonder-Tenner<br>Wendelin Jacomet<br>Giusep Lozza<br>Livio Zanetti |
| b) Suprastonza               | Robert Cajacob<br>Victor Flepp   | Clemens Berther<br>Iso Mazzetta   |
| c) Perstgisas<br>Suprastonza | Jris Lombris   |   |
| d) Cumissiun<br>da gestiun   | Manfred Caviezel   | Beat Hosang   |
| e) Canzlist                  | Andri Hendry   |   |
| f) Hosps                     | 11   |   |

## **Plaid d'avertura entras il president**

Dapi nossa davosa seduta dil cussegl essan s'entupai igl october ad ina fetg interessanta investa dil plazzal da lavur a Val Acletta. Igl ei stau fetg imposant tgei ch'ei tut vegniu baghegiu en quei cuort temps. Aunc inagada in grond engraziament a gerau Iso Mazzetta per quella buna prestaziun. Silsunter havein astgau guder ina buna tscheina ed in'emperneivla sera da cumpignia ella REKA ad Acletta.

### *Ex18*

Ord mia vesta ei quei stau ina fetg bein gartegiada exposiziun, mo sogn Pieder ei buca staus da buna luna quels dis. Tuttina ei neiv stau meglier che tonta plievgia suenter ina stad aschi schetga. La natira ha profitau zun fetg da quei. Jeu less buca tralaschar d'engraziar cun in sincer «engraziel fetg» als organisaturs dall'ex18 per tut la lavur ch'ei vegnida fatga. Quei ei numnadamein ina grondiusa plattafuorma per nossas fatschentas. Aschia san ellas sepresentar fetg bein a lur clientella. Jeu sperel da seveser alla proxima ex.

Communicaziuns:

Mortoris:

Anton (Toni) Cajacob-Caminada, naschius ils 05-01-1941, morts ils 14-09-2018  
Amalia Fry-Tuor, naschida ils 24-01-1926, morta ils 18-09-2018  
Luisa Orlik-Bigliel, naschida ils 17-09-1934, morta ils 10-11-2018  
Culastica (Culastia) Albin-Manetsch, naschida ils 24-01-1924, morta ils 13-11-2018

Naschientschas:

Liam Levy, naschius ils 3-09-2018, fegl dad Eliane ed Adrian Levy  
Mirco Lutz, naschius ils 09-09-2018, fegl da Bianca e Remo Lutz  
Gianna Lou Flury, naschida ils 29-09-2018, feglia da Carla e Martin Flury  
Kevin Oliveira Silva, naschius ils 16-10-2018, fegl da Sandra Filipa Gomes De Oliveira ed Adriano Roberto da Silva  
Siana Bisquolm, naschida ils 12-11-2018, feglia dad Adela e Simon Bisquolm.

## **Tractandas:**

1. Protocol 14-2017/2020
2. Preventiv 2019 (messadi nr. 25-2017/2020)
3. Menaschi tecnic: Credit per la construcziun d'ina remisa a Sogn Placi (messadi nr. 26-2017/2020)

Cussegl da vischnaunca Disentis/Mustér  
Il president: Igl actuar:

Armin Manetsch

Paul Duff



Cussegl da vischnaunca 2017/2020  
Protocol nr. 15  
Seduta dils 15 da november 2018

---

## 1. Protocol

*Protocol nr. 14-2017/2020*

*Il protocol ei vegnius tarmess tier per posiziun. Enteifer ils tschun dis fixai ei vegniu inoltrau neginas objecziuns.*

*Il protocol vegn **approbaus senza midadas**.*

Cussegl da vischnaunca Disentis/Mustér  
Il president: Igl actuar:

Armin Manetsch

Paul Duff



## 2. Preventiv 2019 (messadi nr. 25-2017/2020)

**La fatschenta vegn tgamunada dil vicepresidente dil cussegl Armin Berther.**

### **Presentaziun:**

Suprastonza:

President communal Robert Cajacob:

Las informaziuns impurtontas stattan el messadi. Entras l'introducziun dalla nova contabilitad HRM2 sestauschan las amortisaziuns per 1 onn. Cheutras vesa il quen ora positivs. Las amortisaziuns vegnan denton els onns suandonts ad engraviar il quen, perquei stat la reducziun dil pei da taglia buca en discussiun. En vesta dallas investiziuns vegnentas sco sanaziun ed adattaziun serenera, via d'ual Run, sanaziun casa da scola, plinavon las pretensiuns d'investiment ell'infrastructura turistica ei il basegns d'in bien cash-flow evidents. Quel ei definius cun 1,5 milliuns francs e vegn contonschius cun mesiras da spargn. Per la sanaziun dil CSC savein nus far in deposit per ils cuosts dalla sanaziun ella summa da frs. 900'000.--. Las investiziuns ell'infrastructura turistica, igl indrez d'ennevar ed igl emprest per l'investiziun Cuolm da Vi, ein decididas e vegnan ussa da pagar. Il deivet dalla vischnaunca s'augmenta sin 14 milliuns francs.

Cumissiu da gestiun:

President Manfred Caviezel:

“Conform ad artechel 54 dalla constituziun communal e dil regulativ per la cumissiu da gestiun havein nus controllau il preventiv 2019 sco era la proposta per la fixaziun dil pei da taglia. La cumissiu ha repassau il preventiv en tut ils detagls e ha tschentau sias damondas alla suprastonza communal a caschun d'ina seduta comunabla. Per mauns dil cussegl havein nus rapportau a scret. Tuttina lein nus aunc remarcar in pèr puncts:

#### *Cash-flow*

Il cash-flow da 1,5 milliuns francs ei en uorden denton biebein frs. 500'000.-- pli bass che quel el plan da finanzas 2019 - 2023. Sebasond sils davos quens comunals quintein nus ch'il cash-flow el quen 2019 vegni ad esser pli aults che previus ed aschia possibilitar las investiziuns senza caschunar memia bia deivets.

#### *Dismessa e purificaziun dall'aua / dismessa da rumien*

Ils cuosts da quellas duas finanziaziuns specialas vegnan buca curclai entras las taxas. Ils deficits vegnan cuvri ord il quen ordinari. Quella situaziun stuess vegnir migliurada cun alzar las taxas.

#### *Center da sport e cultura*

Il preventiv dil Center da sport e cultura preveda ina sperdita da frs. 271'000.--. Las prestaziuns dil Center da sport e cultura s'audan tier il service public ed aschia astga quella purschida era custar enzatgei alla vischnaunca. Denton duein ils cuosts vegnir optimai per survegnir ina buna relaziun denter purschida e cuosts.

#### *Quen d'investiziun ed investiziuns futuras*

Il quen d'investiziun 2019 preveda investiziuns nettas ell'altezia da rodond 2,8 milliuns francs ed aschia in alzament dils deivets per 1,3 milliuns francs. La gronda part dallas investiziuns ein gia decididas.

En vesta allas grondas investiziuns futuras eis ei impurtont da tener il pei da taglia sin las entradas e la facultad tier 120%. Plinavon beneventein nus il deposit da frs. 900'000.-- per financiar las investiziuns el CSC.

Gia sco menziunau a caschun dil plan da finanzas lein nus aunc inagada far attents, che las investiziuns ston vegnir priorisadas ed etappadas optimalmein ed eventualmein era redimensiunadas per mantener in saun equilibr denter las investiziuns ed ils deivets. Ins astga buca emblidar che la vischnaunca ha el futur treis gronds projects che ston vegnir realisai:

- renovaziun ed engrondaziun dil Center da sport e cultura
- renovaziun ed engrondaziun dalla serenera Raveras
- renovaziun dalla scola

El num dalla cumissiun da gestiun less jeu engraziar per la buna collaboraziun cun ils differents gremis duront igl entir onn ora. Engraziel fetg!”

### **Discussiun:**

Cussegl:

Conto 0220.4210.00; Il project Hotel Acla da Fontauna ei incerts sch'el vegn realisau. Quent'ins cun las entradas dalla lubientscha da baghegiar cun quella contribuziun, con lunsch ei il project?

Gerau Iso Mazzetta:

Las informaziuns dalla pressa ein buca actualas. Las protestas vegnan discurridas el decuors dils proxims dis e nus quintein da saver dar la lubientscha da baghegiar sil davos digl onn current ni sin l'entschatta da 2019.

Cussegl:

Las expensas per EED sur tuttas rubricas dalla contabilitad ein fetg aultas. Han ins fatg ponderaziuns cun ina sligiazion da server intern. Tier versiuns dad outsourcing dat ei versiuns custeivlas e meins custeivlas. Clar, la segirtad dallas datas ei d'impurtonza.

President communal Robert Cajacob:

Per anflar bunas sligiazions ein las discussiuns en rocla.

Canzlist Andri Hendry:

Il tema da metter las datas ordeifer ni salvar quellas sin in server en casa vegn evaluau cuntuadamein cun nies provider Nervenschoner. Pil mument ei in server en casa pli favoreivels. Il pli impurtont ei la segirtad dallas datas. L'evaluaziun per arcunar tuttas datas vegn fatga. In access pli sperts per l'administraziun fuss in avantatg.

Cussegl:

Conto 1500.3612.01; Ei la clav da reparter ils cuosts dils pumpiers ellas vischnauncas da Sursassiala ussa fatga da niev?

Gerau Victor Flepp:

Ei vegn revediu ils statuts dalla Corporaziun da pumpiers Sursassiala ed en quei mument ei era la revisiun da reparter ils cuosts da sligiar. Per far quei vegn proximamein eligiu ina cumissiun. El medem mument han era liug discussiuns culs pumpiers dallas vischnauncas Sumvitg e Trun pertuccont ina collaboraziun.

Cussegl:

Contos 2110/2120/2130 Scolas; La summa dallas pagas s'augmenta naven d'igl onn 2017 sin 2019 per 25%. Co ei quei pusseivel?

President communal Robert Cajacob:

Sper igl augment dil diember d'affons che basegna classas dapli ei 1% augment general dallas pagas vegniu vitier. Plinavon ei la vegliadetgna dils scolasts in effect ch'augmenta

ils cuosts da paga. Midau ha sin uonn l'instrucziun religiusa. Da niev ei sulet 1 ura religiun egl urari. Vitier vegn denton 1 ura instrucziun etica che vegn dada d'in scolast.

Cussegl:

Conto 2180.3130.01; Pertgei ei l'expensa carschida en tala moda tier la tgira d'affons?

President communal Robert Cajacob:

Il tscheins d'affittaziun dallas localitads dalla canorta Lumpazi ei s'augmentaus. Plinavon ein las uras dils scolasts per agid da pensums dil scalem superiur calculai en quella summa.

Cussegl:

Ei ha giu num che la sanaziun dil CSC vegni coordinada cun la construcziun dil Hotel Acla da Fontauna. Sch'il project dil hotel ha retard ha quei era consequenzas per la sanaziun dil CSC?

Gerau Clemens Berther:

Il project da sanaziun dil CSC vegn preparaus sco il cussegl ha giavischau e presentaus il schaner 2019 al cussegl. La sanaziun digl entir project vegn etappada e cuoza pressapauc 4-5 onns. Per la part dalla sanaziun dat ei subvenziuns e tier la part nova lein nus buca strihar enzatgei. Nus sperein sin bunas contractivas per il hotel culs requirents.

Cussegl:

Conto 4120.3612.00; Tenor indicaziun dalla Casa da tgira PUNTREIS sei da quintar cun in considerabel augment dallas contribuziuns. Pertgei ein quellas el budget 2019 cun in alzament da sulet frs. 20'000.--?

President Robert Cajacob:

Quella summa dils cuosts per spitals, spitex e casas da tgira sa mo vegnir schazegiada. Tut tenor mortoris ch'influenzeschan ils cuosts. Las cefras ein enconuschentas per alla fin digl onn.

Cussegl:

Conto 3500.3300.00; Co ei quei augment da frs. 20'000.-- per onn da declarar?

Canzlist:

La contribuziun alla renovaziun dalla baselgia claustrala da 1 milliun francs concedida dalla vischnaunca vegn amortisada sin tala moda. Dus pagaments da frs. 100'000.-- ein gia succedi ed il tierz suonda igl onn proxim. Mintga pagament vegn amortisau sur tschun onns.

Cussegl:

Ils cuosts per manteniment dallas vias creschan cuntinuadamein. Nua eis ei previu da far lavurs?

Gerau Iso Mazzetta:

Biaras vias da vischnaunca ein en general schliatas perquei ch'il manteniment ei vegnius stuschaus ora sur onns da far. Singulas lavurs ein veseivlas els contos. Certs projects ston uss vegnir realisai.

Cussegl:

Igl ei pia enconuschent nua ch'ils basegns da manteniment dallas vias ein. Ei vala uss da tschappar en ils projects.

Cussegl:

Conto 7301; La dismessa da rumien ei calculada cun in alzament da cuosts enviars il quen 2017. La summa ei denton tuttina sco il budget 2018.

Conto 7301.3130.06; Ils cuosts da cumpostar ein calculai cun frs. 50'000.--. La rauba da cumpostar va all'AXPO. Ei quella expensa era da pagar all'AXPO?

Gerau Victor Flepp:

La dismessa da pastg e cagliom crescha. Nus stuein sliogar la caussa sur la regiun ed havein dumandau la Regiun Surselva per ina sliigiun communabla era cun autras vischnancas. In bien exempel per ina collaboraziun regiunala ei la schigentera da gliet a Zignau. Ei sa esser ch'ina sliigiun regiunala scaffescha piazzas ella regiun. La risposta dalla Regiun Surselva ei aunc buca avon maun.

La rauba da cumpostar va all'AXPO a Domat. Ils transports caschunan ils cuosts indicai. La deponia a Brulf sto el proxim avegnir era vegnir sanada. Co quei duei succeder ei buca clar ed ils cuosts ein perquei era buca calculabels.

Cussegl:

El quen d'investiziun ei previu ina summa per la sanaziun casa da scola. Suonda cheu in messadi?

Conto 3290.5090.00 ei calculaus cun frs. 50'000.-- investiziuns. Ei la signaletica per las fracziuns calculada en quels cuosts?

Gerau Iso Mazzetta:

Per l'expensa sanaziun dalla casa da scola suonda in messadi. Ils cuosts budgetai per l'embellaziun ein destinai per lavurs da signalisaziun alla staziun.

Cussegl:

Conto 6150.5010.12; Tgei lavurs cumpeglan ils cuosts dil project center dil vitg?

Conto 6150.5010.14; Eis ei planisau tier igl access Fontanivas da far in passapei cun plaz per ina crotscha d'affons?

Gerau Iso Mazzetta:

El center dil vitg vulein nus far in studi tgei far cul bazar Nani. Dat ei leu in passapei e tgei empremas mesiras ston vegnir pridas?

Igl access Fontanivas cumpeggia la sbuccada Salaplauna – Punt Fontanivas. Igl ei buca previu in passapei. Ils cuosts stattan buca en relaziun cul basegns per in passapei. La varianta fuss da migliurar la senda encunter Fontanivas.

Cussegl:

Uss cul resort Catrina va encunter la realisaziun ei da quintar cun dapli frequenzas sin las vias da pedunzs per exempel quellas atras Funs sur la via da Paders giu el vitg e la via naven da Latis a Clavaniev. Quellas vias ein buca illuminadas. Ei fuss impurtont e d'avantatg per ils hosps e per ils indigens da sclarir quels passadis. Ei vegness era en favur dallas fatschentas el vitg sche cazzolas fagessen il survetsch da dar clar sin las vias.

Dat ei buca ina sliigiun pli favoreivla cun candelabers ed energia solara per installar l'illuminaziun, il trer cabels electrificai ei custeivel.

Gerau Iso Mazzetta:

Per igl onn 2019 ei buca previu in'investiziun per l'illuminaziun sin quels tschancuns. Quei ei da planisar els onns proxims. In'illuminaziun senza sanar la via ei denton fetg cara. En in project ensemen cun Recal che meina l'aua calda tier ina surbaghegiada sa l'illuminaziun vegnir realisada pli favoreivel.

Cussegl:

Conto 6190.5040.00; La summa per l'investiziun ei s'augmentada per frs. 60'000.--.

Gerau Clemens Berther:

Ils detagls ein descrets el messadi dalla proxima tractanda. Avon in onn settractava ei aunc d'in schazetg. Il plan detagliau ha demussau ch'igl ei necessari da planir il fundament e cheutras era da trer naven las auas. Quei effectuescha cuosts supplementars.

Cussegl:

Conto 7201.5032.51; Tgei investiziun vegn fatga tier la scargada dalla via Raveras?

Gerau Iso Mazzetta:

La sanaziun dalla dismessa d'aua va en connex cun la sanaziun dalla via Raveras. Il canal existent sto vegnir slargaus. Cheu ei il project vegnius pli cars che quei ch'era schazegiau.

Cussegl:

Conto 7201.5032.11; La summa per la canalisaziun Mumpé Medel ei indicada cun sur frs. 100'000.-- surpli expensa che previu igl onn vargau.

Gerau Victor Flepp:

Ei setracta cheu dalla 2. etappa da quell'investiziun e sanaziun. La summa ei previda per la canalisaziun cun frs. 290'000.--. Il surpli ei d'attribuir alla differenza denter schazetg e project detagliau. La basa dil project ei frs. 410'000.--.

Cussegl:

Conto 7300.5043.02; Ei ha gie num che la cumpra d'in moloc cuosti frs. 5'000.--. Per baghegiar 14 molocs ein ussa sur frs. 160'000.-- el budget.

Gerau Victor Flepp:

La cumpra per dus molocs installai ei stada 2x frs. 5'000.-- denton senza baghegiar en els. Quels cuosts vegnan vitier. Nus quintein denton cun in respargn da cuosts da dismetter rumians el moloc. Il camiun da rumien sto far aschia sulet in viadi per jamna. Con che quei respargn vegn ad esser stuein nus secunvegnir cun la Regiun Surselva.

Il project dils molocs suonda en in messadi el decuors digl onn 2019. El resort Catrina ei in moloc gia installaus.

Cussegl:

Pertgei ein las summas per igl indrez da far neiv sco era per rempars e punts el preventiv 2019?

President communal Robert Cajacob:

Tenor contract stuein nus scuntrar il quen per quellas investiziuns egl onn vegnent.

Cussegl:

Conto 8205.5010.00; Tgei cumpeglia l'expensa vid la via d'uaul Run?

Gerau Clemens Berther:

Cun frs. 120'000.-- vegn planisau la via d'uaul Run. Quella meina naven dalla via cantunala en Val Cuoz sper igl ual da Segnas si a Peisel, vinavon tras la Val Peisel – Plaunca Su - Pardi - Val Acletta- Crest dil Peter - Fostatg Lartg - Plaun Grond tochen ils Bletschs sur la Val Schetga Val Mala.

Cussegl:

Ils tscheins per las posiziuns dils emprests ein calculai cun frs. 148'000.--. Quella summa sa vegnir reducida. La suprastonza duess far diever da pusseivladads alternativas da prender si daners e buca sebasar sulet sin las offertas dallas bancas.

President communal Robert Cajacob:

Quei vegn tratg en consideraziun, denton lein nus ton sco pusseivel luvrar ensemen cun nossas bancas.

Cussegl:

Ella controlla da credits maunca il credit per igl indrez da far neiv.

Il credit Loipa Cadi ei cun frs. 170'000.-- buca en cumpetenzza dalla suprastonza sco indicau mobein survarga quella.

Canzlist Andri Hendry:

Tier quei credit ei la contribuziun dil cantun aunc buca pagada. La posiziun netto vegn a restar cun 10% dalla summa indicada actualmein.

La posiziun per igl indrez da far neiv vegn cumpletada.



Cussegl:

Tier la posiziun «baghetg pil santeri» ha la suprastanza dau in credit supplementar. Per tgei ei quel vegnius daus?

Gerau Victor Flepp:

Igl ei stau necessari d'installar glisch electrica cun fotovoltaic. Quels cuosts han augmentau la summa.

Cussegl:

Ei l'indicaziun dall'investiziun Via Sogn Placi gesta? Stuess ei buca esser in plus enstagl d'in minus?

Gerau Iso Mazzetta:

Igl incasso dils cuosts da perimenter suondan ed il saldo dat frs. 0.--.

Cussegl:

L'expensa cumulada per la planisaziun dil CSC ei indicada cun frs. 261'000.--. Constat quella cefra cun la planisaziun occurrada entochen uss?

Gerau Clemens Berther:

Ils architects ein huslis vid las planisaziuns ed han buca dau il quen per lur lavur fatga mobein mo per ina part da quella.

Cussegl:

Il plan da finanzas preveda investiziuns da 2 milliuns francs per onn egl avegnir. Quellas san buca vegnir fatgas e projects vegnents ein periclitai sch'il cash-flow ei sil nivel da 1,5 milliuns francs. Ei la suprastanza pertscharta dalla situaziun. Ein mesiras da spargn vegnidadas ponderadas en connex cul preventiv?

President communal Robert Cajacob:

La suprastanza ha fatg sforzs da spargnar. Scursanir il preventiv ei strusch pusseivel arisguard tutt'expensas fixas. Ord nossa vesta ei il preventiv verdeivels, il cash-flow sufficient. Ils facturs incerts ein ella damonda tgei ch'il resort Catrina porta dapli. En quei grau vivin nus dalla speranza, plinavon dall'experientscha ch'il quen vesa ora meglier ch'il budget. Nus savein star davos nossas calculaziuns. Mustér ha bunas premissas suenter ch'ils projects ein realisai.

### **Decisiun:**

***En concordanza cun la cumissiun da gestiun propona la suprastanza communal al cussegl da vischnaunca da:***

- 1. Approbar il preventiv 2019 cun suttametter quel al referendum facultativ conform agl art. 21, lit.a dalla constituziun communal;***
- 2. Fixar il pei da taglia sin las entradas e la facultad sin 120% dalla taglia cantunala ed il pei da taglia sin schischom ad 1,7‰ (sco tochen dacheu).***

***Il cussegl approbescha las propostas dalla suprastanza unanimamein senza abstenziuns.***

Cussegl da vischnaunca Disentis/Mustér  
Il president: Igl actuar:

Armin Manetsch

Paul Duff



### **3. Menaschi tecnic: Credit per la construcziun d'ina remisa a Sogn Placi (messadi nr. 26-2017/2020)**

#### ***Presentaziun:***

Suprastonza:

Gerau Clemens Berther:

Il material dil menaschi tecnic da vischnaunca ei oz deponius en plirs loghens. Igl inventari ei zun gronds ed exista ord tontas variantas per diever la stad ed unviern. Quel drova era in duiu quitau e manteniment. A Sogn Placi sa vegnir creau in liug ideal central per il material e maschinas. La situaziun migliurass era l'efficienza dil menaschi tecnic sco era il maletg cun in deposit central. Dalla summa totala dil project da frs. 216'000.00 sa la gruppa da lavur dalla vischnaunca exequir ina part da rodund frs. 26'000.00 en atgna reschia.

#### ***Discussiun:***

Cussegl:

Avon 10 onns era la gronda part dil material ed inventari dil menaschi da vischnaunca el CSC. Lura ei vegniu vitier il baghetg dil militar. Ei vegn avon aschia, pli bia plaz ch'ins ha e pli bia ch'ins drova. Pliras maschinas surveschan era alla regiun vischinonta. San quellas vischnauncas era separticipar vid ils cuosts? Ei ina varianta a Cuoz buca situada pli central? Leu savess esser in plaz per metter sut tetg maschinas. Plinavon fuss spazi da baghegiar ora alla baracca verda.

Dess ei cuosts pli aults da cumprar terren a Cuoz?

Gerau Clemens Berther:

A Cuoz ein las maschinas che ston esser contonschiblas tut il temps. Il CSC sto vegnir svidaus. La nova remisa a Sogn Placi ei destinada per material e meins per maschinas ed ha per quei intent in grond avantatg. La gronda part dil material ei presenta en in liug. Perquei che quella varianta ei adattada ei buca vegniu dumandau suenter prezis a Cuoz. Per manevrar maschinas ei igl areal baracca verda buca adattaus. La varianta vegness pli cara.

Cussegl:

Ei Sogn Placi buca en zona da prighel?

En autras vischnauncas p.ex. Sumvitg, Trun e Breil ei il material era deponius en remisas ordeifer il vitg nua ch'il maletg disturba buca. Ina remisa a Cuoz disturbass il maletg dil vitg.

En baracca verda ei il baghetg era aviarts. San ins buca far las stialas direct el liug dalla pegna?

Gerau Iso Mazzetta:

Il plaz a Sogn Placi ei davos il rempar en zona blaua. Ina remisa aviarta a Cuoz vegness buca lubida dalla cumissiun da baghegiar.

Gerau Clemens Berther:

Las stialas ein buca destinadas sulet per la pegna centrala. Nus vein il baghetg luvratori Cuoz ni la scola da Segnas che vegnan scaldai cun stialas ed ei dat situaziuns nunprevedidas ch'ei drova stialas.

**Decisiun:**

**La suprastanza communal propona al cussegl da vischnaunca da:**

- 1. Approbar il project «Remisa Sogn Placi» per la realisaziun;**
- 2. Conceder in credit net da frs. 216'000.-- per ereger a Sogn Placi ina remisa pil menaschi tecnic.**
- 3. Da suttametter quei conclus al referendum facultativ tenor art. 21, lit. c dalla constituziun communal.**

**Il cussegl approbescha il project remisa Sogn Placi cun 12 gie, 2 na ed 1 abstenziun.**

Cussegl da vischnaunca Disentis/Mustér  
Il president: Igl actuar:

Armin Manetsch

Paul Duff



**Cussegl da vischnaunca 2017/2020**  
**Protocol nr. 15**  
Seduta dils 15 da november 2018

---

**Orientaziuns:**

Cussegliera Rita Huonder-Tenner engrazia en num dil comite d'organisaziun dall'exposiziun ex18 al personal dil menaschi tecnic dalla vischnaunca per ils buns survetschs. La situaziun cun la gronda neiv ei stada zun greva. Ils collaboraturs dalla vischnaunca han gia baul rumiau ils parcadis e las vias d'access. Ils pumpiers ein stai tutta notg en acziun per schurmegiar la tenda gronda. La suprastanza ha dau agid e sustegn en tuttas direcziuns. La damonda per in'ulteriura exposiziun ei stada actuala da tuttas varts era grazia a quei agid spontan.

Cussegliaer Armin Berther inoltrescha in'interpellaziun partenent il survetsch medicinal e veterinari en vischnaunca e regiun Cadi.

Cussegl da vischnaunca Disentis/Mustér  
Il president: Igl actuar:

Armin Manetsch

Paul Duff

Disentis/Mustér, ils 22 da november 2018